

سلامتك يا بطل يم الموت.. شعر: المستشار عماد أبو هاشم



الثلاثاء 10 ديسمبر 2013 02:03 م

قالولى ليه بتتعذب
وأشعارك بتكى
والبكا موصول
وليه بالحب تتألم
وقولة آه
تفجرها
كده على طول
وليه الحزن فى قلبك
كما ليل الشتا أسود
وتوبك بالدموع مبلول
وليه الهم من بدرى
دخل دارك
كما التعبان
وعشش فى نواحيها
جدا وغربان
فتحت الباب لأعداءك
وبابك كان عليك مقفول
وليه بتعانى التيار
وتمشى فى العناد وحدك

تشيل الهم عن غيرك
وغيرك بالهوان راضى
وقاعد فى حريم الدار
بيتدلج
ويتسنت
وبعد عن طريق الغول
فالولى إنت مش خايف
ومش شايف
بيحصل إيه
بلد طايعه
بناكل كل أولادها
بتحرق نفسها بإيدها
حتسمع من كلامك قول
مَ تسكت زى مَ احنا كلنا ساكتين
وعيش في الوحله زيينا
ووطيلهم
يحطوا فوق دماغك طين
حيحصل إيه
مَ طول العمر أجدادنا كده عايشين
في وحله وطين
عايزنا نقول ونتكلم
وإيه حنقول
وحبل المشنقه فى المشنقه مفتول
ومين يقدر في وش الغول
ولو مره
يقف ويقول
عيونك حمرة ليه يا غول
قالولى كتير
وقتلهم
أعيش ازاي
وصاحبى لجل يفدينى
رصاص الغدر خد عمره
مَ خفتشى مِ الألم والموت
رصاص الغدر صاب قلبه
سلامتك يا بطل مِ الموت
مَ كانشى فى العشم أرجع

واسييك فى الميدان مقتول
أعيش ازاي
وانا شايف غريمك حى
وابوك وامك وأولادك
دموعهم دم
ورجاله على راسها طرّح فى الحى
وناس فاجره
مَ عندها دم
فلول ماشيه
وراها فلول
أعيش ازاي
وانا شايف
بنات حلوه
بتسترجل
وتخرج للرصاص والموت
وأطفالنا
سلاحهم بلونات في خيوط
بترفع فى مدارسها إشارة رابعه فى الفسحه
وترسمها على الكشكول
أنا مكسوف
وخلان م النسا جدًا
و م الأطفال
عملتم إيه يارجاله
كفايا فلسفه فارغه
ولعب عيال
قالولى كتير
وقتلهم
ودلوقتى الكلام موصول

لمستشار عماد أبو هاشم رئيس محكمة المنصورة عضو المكتب التنفيذى لحركة قضاة من أجل مصر

